

鞏縣志卷之二

鞏縣知縣李述武纂修

地理志

倣班史星野叙於地理志各國之首不另立天文志以星野係一郡邑不得專之猶武功安陽靈壽等志例也沿革倣續通志表及施郡志表而取郡志古蹟內夏伯國四條入焉為邑先紀其大者庶展卷瞭然非變前人例也疆域後仍附載河灘地以事關政治倣閩粵海灘江南蘆洲例不嫌瑣碎也志地理

星野

鞏於周為鶉火之次

〔前漢書地理志〕周地七星張之分野也今之河南雒陽穀成平陰偃師鞏緱氏是其分也自柳三度至張十二度謂之鶉火之次周之分也

〔施郡志〕按鶉火之次分初中終以柳占十三度半七星占六度太張占十七度太故初柳七中七星七終張十四也柳接商洛之陽接南河上流當今郡城以西七星係軒轅中嶽象當今郡城以東舊府志謂郡城以東諸城屬於柳居多以西諸城屬於星居多謬矣

沿革

鞏在夏時爲夏伯國

〔名勝志〕鄗城在鞏縣西南禹封夏伯於此〔史記〕自洛汭延至伊汭有夏之居也

又爲陽無固

〔汲冢周書〕武王謂太公曰吾將因有夏之居〔史記〕武王問周公曰自洛汭延於伊汭居陽無固其有夏之居我南望三塗北望嶽鄙顧詹有河粵瞻洛伊毋遠天室

〔施郡志〕按周書所謂陽無固者鄗城別名也其城正在洛汭伊汭之間或以陽無固爲登封陽城陽城在嵩高南洛汭伊汭俱在嵩高北何得以陽無固以陽無因爲陽城蓋陽城亦在鄗

城封內故禹避舜之子於陽城示欲守舊封之意竹書舜命夏后有事於太室太室鄗山鎮也在禹封內故主其祀迨武周營洛諄諄無遠天室者其亦徵諸鄗城歟鄗於夏又爲斟鄩氏於周又爲鄗羅之邑其後或以鄗名或以羅名實一地也于今爲羅庄在鞏西南五十里

又在夏爲斟鄩國

〔竹書紀年〕帝太康即位居斟鄩畋於洛表羿入居斟鄩帝仲康即位居斟鄩徐夔按前漢書臣瓚註曰斟鄩在河南汲郡古文太康居斟鄩又在傳郊尋註河南鞏縣有地名中括地志故鄗城在洛州鞏縣西南五十八里書序曰太康失邦昆弟五人

須於洛汭此即太康之居爲近洛也襄四年傳曰夏之方衰也
后羿自鉏遷於窮石晉地記曰河南有窮谷羿國於有窮者即
此也漢志北海平壽縣臣瓚引汲郡古文太康居斟鄩羿亦居
之時斟鄩又自河南遷北海也孔氏書疏曰羿廢太康猶立仲
康不自立則是時羿居斟鄩而立仲康故仲康亦居斟鄩也一
施府志一邵子皇極經世曰仲康崩相繼立依同姓斟灌斟鄩
氏二國夏同姓則斟鄩之封當在禹時禹以故邑封同姓守其
宗社人民後世遂於此即位耳地理志北海有斟縣郡國志平
壽有斟城獨臣瓚漢書註斟鄩在河南非平壽也書序太康弟
五人篯於洛汭是太康之居爲近洛也綱目前編謂太康城於

又夏爲有洛氏國

尙書五子之歌太康畋於有洛之表 一汲冢周書一有洛氏宮
室無常池囿廣大工功日進以後更前民不得休農失其時饑
饉無食成湯伐之有洛以亡

一施府志一太康居斟鄩畋於有洛則有洛國當近鄩城解經者
皆言洛表爲洛水之濱不知有洛實國名也有洛見於夏初而

亡於成湯蓋與夏祚相終始矣

周爲鞏伯國

〔水經注〕鞏故城東周所居本周之畿內鞏伯國也

〔山河兩戒考註〕昭二十二年子朝奔京鞏簡公敗績於京杜

註周卿士今鞏縣西南三十里有故鞏城

〔方輿記要〕左傳昭二十六年晉師克鞏逐王子朝爾雅曰鞏固也四面有河山之固也

〔施府志〕按鞏伯之封當在周初鞏簡公其後也爲王卿士在東周子朝之亂時又左傳闕鞏之甲武所以克商也路史闕鞏國也是武周以前已有鞏國之舊封矣

周考王時爲惠公子班所封邑號東周

〔史記〕考王封其弟於河南是爲桓公以續周公之官職桓公

卒子威公代立威公卒子惠公代立乃封少子於鞏徐廣曰惠公之少子也

以奉王號東周惠公也〔名勝志〕顯王二年西周惠公封少子

班於鞏以奉王號東周

〔施府志〕按東周之封在顯王二年而前府續志載考王十有

五年西周公封少子云云前後相隔且百年是又讀史公周本

紀而誤者也周本紀曰考王封其弟於河南是爲桓公以續周

公之官職桓公卒子威公代立威公卒子惠公代立乃封其少

子於鞏以奉王號東周惠公史記本究考王封桓之始末而言

之而自桓及惠已至顯王之世矣何得爲考王時已有東周公之封也

〔徐廣前漢書註〕周比亡時凡七縣河南洛陽穀城平陰偃師鞏緱氏

戰國時半屬韓

〔戰國策〕蘇秦說韓王韓有鞏洛之險 〔史記〕莊襄元年蒙驁

伐韓韓獻成臯鞏

按左襄二十一年孟獻子請城虎牢以偪鄭杜註虎牢舊鄭地今屬晉十三年諸侯之師成虎牢晉師城梧及制杜注梧制皆舊鄭地晉並取之不獨虎牢曰將歸竟未歸也則虎牢以西至鞏伯封界自襄王以後皆屬晉矣昭二十六年晉師納王知軼荀躒首克鞏召伯遂逐子朝迎王晉師從已地入也其後韓分晉地鞏地遂半屬韓與東周君分鞏而治東周既滅其所保七縣皆爲秦所有韓之鞏是年亦即歸秦矣

秦屬三川郡爲洛陽東境

漢置鞏縣屬河南郡

魏仍之

晉屬河南尹

劉宋屬河南郡

東魏天平改屬成臯郡

北齊廢

隋開皇十六年復置屬河南郡

唐屬河南府河南縣

〔唐書地理志〕鞏緱

宋屬京西北路河南府

〔施府志〕永安城太祖父昭皇帝葬於此曰永安陵景德中割鞏假二縣置邑以奉陵寢後爲永安軍又〔方輿紀要〕又有南城軍紹興二年岳飛遣諸將收復河南楊遇復南城軍張憲復永安軍是也

金屬金昌府改永安軍曰芝田屬金昌府元廢

元屬河南府路廢芝田入鞏縣又改鞏縣爲軍州萬戶府

〔元史〕至正二十年改鞏縣爲軍州萬戶府招民屯糧

明屬河南府

國朝因之

疆域

縣在府東一百三十里東至汜水縣界三十里至汜水縣四十里西至偃師縣界三十里至偃師縣六十里南至登封縣界五枝嶺八十里至登封縣一百二十里北至溫縣黃河界二十里至溫縣二十五里東南至滎陽縣萬山六十里至滎陽縣八十里東北至汜水縣黃河界四十里西南至登封界崑嶺八十里至登封縣一百一十五里西北至孟津縣界七十里至孟津縣八十里東至省城開封府二百九十里北達京師一千八百里廣一百里袤一百二十里

附灘地界

乾隆五年鞏溫二縣會詳撫院雅批定鞏溫黃河灘地界址東至寥子峪汜界起西至支家峪止寥子峪至金溝鞏得地南北長五里二百四十弓至溫界洛口鞏得地南北長七里一百八十弓至溫界自桃峪溝起至七里舖止鞏得地東長九里至溫界西長七里至溫界神堤大王廟地字六號起至八號止東西寬三里鞏得地南北長四里二百一十弓至溫界又自地字九號起至十四號止東西寬五里三百二十四弓鞏得地南北長四里四十二弓一尺至溫界又自石板溝起至支家峪止東西十一里寬鞏得地南北長二里三百四十七弓三尺至溫界乾隆八年河洛二縣詳准撫院碩批定鞏孟黃河灘地界址東至

虎朋溝西至羊峪溝偃界止塌坡村灘地南除護山地二百四十弓外鞏得地南北長一千零七十弓至孟界趙家溝灘地南除護山地二百四十弓外鞏得地南北長九百六十九弓二尺至孟界其餘木蘭溝于家溝馬峪溝柏坡等處村庄黃河灘地俱與孟縣以河爲界

乾隆四十七年蒙 上憲斷案于家溝張家嶺遠楊嶺焦家灣黃河灘地與溫孟二縣以河爲界
形勝附

〔李通志〕鞏縣東接成臯西連古亳